

# OMUKWETU

Registered at the General Post Office as a Newspaper

10c

## “EKWATHO LYANDJE OTALI ZI KOMUWA”

(Ps.121:2)

(Oshipalanyolo shonuumvo)

Omumvo 1977 gwa piti otatu kambadhala okufuta oongunga dhetu dhuuwanawa auhe pambepo nopalutu, ihe osha yela itatu vulu okufuta uuwanawa auhe twa ningilwa. Uuwanawa wOmuwa, ndi u fute ngiini? “Nda hala okuyamba omahabelelondjimbo” Eps.116:

Otatu pandula Kalunga sho e tu pe omumvo 1978 kesilohenda. Otu gu li petameko lela, ihe inatu tseya shoka shi li mokati kagwo nosigo okebulilo lyagwo.

Omumvo kehe ohatu taamba, meitaalo, kutya ogwo omagano twe ga pewa ku-Kalunga, onke otwi itaala kutya ashihe, mugwo, itashi iyaka ehala ewanawa lyesilohenda lyaKalunga.

Pangeleka otu na omukalo okukonga aluhe oshipalanyolo shomumvo kehe. Omimvo dha pita otwa li niipalanyolo ngashi: “Ikoleleni, Ohole, Eitaalo. Ehala lyouye nali gwanithwe. Oohapu dhaKristus nadi kale dhu udhilila mune” nosho tuu. Oye tu kwatha nawa.

Elalakano olyo okugongela omadhiladhilo gootaali, okukala momadhiladhilo ngoka osho wo oku ga tula miilonga mokukalamwenyo kwesiku kehe. Opo ku kale sha shoka tashi fatulilwa nokukonakonwa kiilyo ayihe yOngeleka. Enenedhiladhilo opo iilyo yi mone ekwatho alihe tali pumbiwa monkalo yakehe gumwe, momumvo nguka.

Mokuhogolola oshipalanyolo kehe ohapu talwa omumvo nethimbo kutya olya tya ngiini. Nando inatu tseya oshike tashi ya, otapu talwa ovelise yini nenge amatumbulo ga tya ngiini ge shi okukwatha aantu nokukonakonwa omumvo ngoka ngashi tapu talwa gu li nenge tagu ka kala.

Epangelongeleka lyeti 8-9/1977, lya gongala mOshigambo, moshitokolitho shalyo 308/77 otashi ti: “Epangelongeleka lyu utha oshipalanyolo shomumvo 1978 shi kale: “EKWATHO LYANDJE OTALI ZI KOMUWA” Eps.121:2

“Otatu pandula Kalunga sho e tu pe omumvo 1978 kesilohenda.

Omumvo kehe ohatu taamba meitaalo kutya ogwo omagano twe ga pewa kuKalunga. Omahalelo momaudhigu getu agehe ogo: Udheni Ombepo Ondjapuki”

(Ef.5:18) - Dumeni.



Omuwilikingeleka Kleopas Dumeni

Mpaka opwa dhiladhilwa kutya onkalo yiilyo ayihe yongeleka noyomushitwa kehe oyu udha omapulo. Moonkalo adhihe ngashi moondjokana, momagumbo maanona, maagundjuka noosikola, moondolongo, aavu aawiliki yiilonga, oonakukala muupika woludhi kehe, aanaluhepo, aakwiita, oonakuyona, mboka taa hepekwa koondjo, aaitaali wo mekondjo lyawo,

oonakuvitha Evaangeli, oonakukondjela ombili nemanguluko lyomuntu aguhe, omwenyo nolutu. Koombinga adhihe, moongundu adhihe nomoonkalo adhihe nomaanu ayehe okwa fa taku uvika eigidho nepulo ndika “EKWATHO LYANDJE OTALI ZI PENI?”

Tala kep. 3



# OMUKWETU

## OMUMVO NONGOLA

Momumvo 1977 ELOK okwa gwanitha oshinakugwanithwa she sheuvitho lye-vaangeli. Aanashilonga ayehe mongeleka oya gwanitha iinakugwanithwa yawo. Otatu hambelele Kalunga omolwomayakulo agehe gopamwenyo nopalutu twe ga topolelwa.

Oshigongingeleka shopaulumompu- mbwe osha li sha ningwa naahogolo- lwa yomomagongalo oya li ya holola uupenda neitulomo moonkundathana dhokuhumitha komeho ELOK. ligongi wo yilwe yopakriste, mongeleka ayihe nenge miitayingeleka, oya holola ohole yaakriste okuhola omuhupithi nongeleka yawo. Miituthitumo twa li tu yi na oye tu hololele kutya ELOK oye ongeleka yEtumo.

ELOK mekwatathano noongeleka Oonkwaluther muNamibia okwa kala i ilongekidhila uukumwe. Omalongekidho ogendji oga ningwa miigongi nomoonkundathana dhilwe na ELOK kee na omaimbo gasha.

Omatalelopo gOmuwilikingeleka momagongalo nomiitayilonga yilwe oga pendutha noga hwamitha ohokwe ompe maakriste oyendji niinima oyindji oya penduthwa po ishewe momagongalo. Omatalelopo gaawilikingeleka naayakulingeleka kombanda yomafuta oga ningi ELOK kuume koyendji muuyuni. Shika osha ningi ekwatho kiilyo ya ELOK yomeni na unene mbyoka yomehalakano. Ngashi omumbisofi pamwe naayakuli ye a talelepo iilyo ye yomehalakano: muTanzania naZambia. Kalunga oku shi okuhambelwa.

ELOK pamwe noongeleka oonkwawo muNamibia okwa kambadhala okupopila uuthemba womuntu. Omahepeko gaa na uuyuki taga ningilwa aakwashigwana kaakwanepangelo yomoshilongo shika ELOK okwe ga holola osho wo kaakalelipo yatano yomavi gokUuninginino, mboka ye ya moonkundathana omolwomukundu gwevi ndika, ELOK okwa gandja edhiladhilo lye puu-yelele nkene ta dhiladhila onakuyiwa yevi ndika.

## EHALAKANITHOPO LYOSHIGONGI SHA SWAPO

Okuhalakanitha po oshigongi sha pe- wa epitikilo oshinima kaashi shi okuu- viwa ko. Ngele otatu ti kutya oshigo- ngi osha halakanithwa po kaahololi yomadhiladhilo (demonstrators) nena naashika itashi gandja eyamukulo lya gwana, oshoka kape na omuntu ha holola omadhiladhilo ge ta file aantu omavi noku ya dhenga nomapokolo- shila ngoka omuniita naantu ngo.

linima ya tya ngeyi sho tayi pangu- lwa, nena aatamaneki otaya pula ku- tya omolwashike haku popiwa ashike kushoka oshiwiniya sha ningwa kepa- ngelo, ihe iilonga iiwinayi hayi longwa ku SWAPO ihaku popiwa nando osha. Etompelo oondjoka kutya mpaka otapu ulikwa kungoka omupangeli nomutoti gwooveta nomudhiginini gwadho nelandulathano moshilongo -nkene tedhi yono mwene.

Ngele otatu ti kutya ehalakanithopo lyoshigongi shika oshinima sha zi moohapu oombwinayi tadhi popi aale- li yepangelo lyOwambo, moka mwa kwatelelwa omalenga naakwaniilwa, naashika itashi gandja eyamukulo.

Nando inashi pumbiwa okutya kutya ngoka a li ta popi oye omukwaniilwa ta popi aakwaniilwa aakwawo, etom- pelo oondjoka kutya shoka sha li ta- shi popiwa kuye osho okuholola oma- dhiladhilo gongundu yopolotika ndjo- ka a gama kuyo. Omunapolotika kehe oku na okukala i ilongekidha okupopi- wa nayi. Ngele omukuluntu nena omu- kuluntu oha li ombinzi nuutsika.

Ishewe ngele to pulakene mboka taa geye yo haya popi yakwawo nayi, o- tashi limbilike. Oshiholelwa, dhiladhi- la nando omusamane Sam Nuyoma tu ulwa kutya okakombo kokOngandje- ra. Omuntu ndishi ngele okwe ku hi- ndi kape na uuthemba oku mu ehame- ka -paveta. Nenge oveta R17 sho ya kuthwa po otashi ti aantu otaa dhe- ngwa nee pwaa na epangulo lyasha? Ngele otatu ti kutya oshinima osha ningwa pamikalo dhOshiwambo, kaku na iinima ya tya ngaaka. Omuwambo oha ti, ngashi omunyoli gumwe a nyo- lele ta popi nkene omadhengo itaaga kwatha sha:

"..... Omuwambo omukulu okwa tungi- le aatekulu ongano tayi ti: Niindongo yaandjetu nando dhenga." Okwa tsiki- le ko ta ti kutya omadhengo otaga e- ta uutondwe pokati kaavali nomaluva- lo. Otaga koleke SWAPO kolutu nomo- mwago. Ehokololo olya tsikile tali ti: "Omuntu gwomwenyo oha yaalele ngoka ta hepa, noha gama kombinga yomuhepekwa ngoka." Aawambo ndi- shi ohaa ti:

"O, akutu, nde ya yaalela tuu." Nenge "nde mu yaalela tuu." lhaa ti nando: "Iyaloo, dhipaga oshipuka." Shila oku- ninga oshilikama.

Omadhengo gomuntu inaa pangulwa ye a monike ondjo yokumudhengitha oshi- nima tashi limbilike. Okwiindika aantu yaa holole omadhiladhilo gawo nomi- zalo noohapu nomainyengo gontumba, itashi mweneke omadhiladhilo gaantu. Iilonga yatya ngeyi itayi tsu wo ku- mwe nomulandu gwombili ngoka hagu uvithwa kaapangeli yetu.

Ngele oministeli yUuyuki inayi tsey- a kutya omadhengo oge ende ngiini ne- na oku na okutseyithila aasolotati ye kutya ihashi ningwa okuhula omukiintu kee shi gwoye oonguwo. Efatululo

lyaashoka oku mu kwata komatha. I- shewe okuhula aantu ayehe oonguwo ndhoka dhi na endhindhiliko lya SWA- PO kashi li mondjila. Okuholola oma- dhiladhilo hoka nenge okudhima po e- hangano? Ngele omuntu oto li dhimi po lyo lya pitikwa kepangelo otashi ti ngiini?

Omadhengo ngaka osho ekondjithatha- no nohofa yopombanda ya S. Africa (muBloemfontein) ndjoka ya keelela omadhengo. Ngele oveta yokuBloem- fontein opo yi li nena aantu ya tya ngaaka naya landulwe. Nenge ku tse- yithwe kutya oveta kayi po we. Shika otashi kondjitha wo omulandu gwomu- panguli Steyn ngoka a pitika iigongi yi ningwe.

Shika osho okutungu uutondwe, aa- kwashigwana taa kondjithathana. O- muntu iha uvithwa ko nomadhengo ihe onelongo. Oshiholelwa oshiwanaawa oongeleka dhiimpaga ihadhi kondji- thwa nokudhengwa ihe onelongo. Sho- ka tashi hupitha oshilongo shika osho okuninga ashije paushili nopwaa na elongitho lyiineya.

## OFIKOLA YANGELA

ENONGELO LANGELA OTALI KA HOVELA 1 FEBULUALI 1978. OVA- POFI NEEMBOLO, OKUDJA PEE- DULA 15, OTAVA TEELELWA.

OFIKOLA YOMBIBELI OTAI KA KALA KO MUFEBULUALI FIYO MAALITSA. OVO VA HALA OKU- KONAKONA OMBIBELI NAVA NI- NGE DIVA OMAINDILO.

Enongelo IOvayakuliongalo  
Engela

## OOUNONA KOUVALELO UYAPUKI

Oshoongalelengeleka shOngeleka O- nghwaevaangeli paLuther muSoomi osha tokola okupitikila oounona ovo inava pa- mekwa kOuvalelo Uyapuki.

Omawi 81 okwa hoolola ombinga yelu- ndululo momaufomhango. Oshoongalele- ngeleka osha ti, oounona va shashwa na- va ye kOuvalelo Uyapuki, pamwe no- vakulunhu vavo ile novakulunhu vamwe ve lili; ngeenge ove udite ko kutya oi- vilo yopakalunga otai ti shike.

Inaku ningwa engambeko meedula, nde- le momakanghameno omatokolo, oshoo- ngalelengeleka osha ulika kutya oounona veedula 5-7 otava dulu okuuda ko kutya Ouvalelo Uyapuki otai ti shike.

Omawi 81 okwa koya ashike kanini oiti- ne itatu, ouhupu womawi 79, oo a li e na okukala taa popile oshinima eshi, opo ku ningwe elundululo momaufomhango. Omubishofi umwe aeke, Hassen Leino- nen waOulu, oo ina popila oshinima eshi.

(LWI)



**DHIMWE DHOMOONTOKOLWA  
DHEPANGELONGELEKA LYETI 28-29.12.1977**

341

Epangelongeleka olya koleke, efaneko lyEwilikongundu lyomusiki mu ELOC, o-madhina gaamboka taa yi molweendo lwoondjimbo kuEuropa, ga kale ngashi taga landula: Hosea Nampala (omuwiliki gwasheendo), Magdalena Kambudu (omudheuli) naakwathi ye Jaakko Kangai, Matti Endjala naToivo Ndevaetela. Yalwe oyo: Wilhelmina Magongo, Hilma Niipindi Endjambi, Kefas Shipwata, Mateus Ntinda, Teopolina Sheetekela naRegina Petrus. Aapeha: Maria Haipinge, Hendrina Naingwendje naLuise Kamati. Ethimbo lyokuya nolyokukala kuEuropa otali ka uthwa komeho kEpangelongeleka, mevathano nEhanganotumo lyaSoomi.

343

Omulongwasita Filippus Henok, ngoka a mana eilongo lye lyuusitagongalo kuMupumulo, Natal, Epangelongeleka olyu utha i idheule etata lyomumvo megongalo lyaKaku, okutameka muJanuali 1978 naakwathi ye meidheulo: Omusita Lasarus Ngipandulua nomutonateli Festus Ashipala.

371

Omusitagongalo Elia Niinkoti, ngoka e li omulongi mEnongelo a uthwa a kale o-mupehamukuluntu gwEnongelo, okutameka muJanuali 1978.

372

Omulongi Josef Halweendo a uthwa a kale omulongi omukuluntu moshilonga shomokati kaaposi mEnongelo mEngela, peha lyaSakaria Nghikefelwa, ngoka ta ka yakula kuKongo nEkoka, okutameka 1 lyaFebuluali 1978.

373

Omusita Reinhold Muremi a uthwa a ka yakule iilyo yongeleka yetu ku C.D.M., okutameka 1 lyaFebuluali.

378

Omulongi Justus David nomukulukadhi gwe Ruth naanona yawo yaali, yu uthwa kEpangelongeleka ya kale aatumwa yOngeleka yetu, moshilongatumo kuSenegal nomalongekidho gokuya ko ga uthwa ga tamekwe.



368

Epangelongeleka lya taamba etseyitho lyoluhodhi kutya omudiakoni, Aili Amupadhi, Kalunga okwe mu ile po ombaadhilila. Epangelongeleka otali halele omusamane gwe naanona, osho wo egongalo lyOnguta ehekeleko netalaleko tali zi kuKalunga, moluhodhi nduka.

381

Ewilikongundu epe lyoStudy Project lya uthwa mu kale: Timoteus Shipanga (omuhayi), Elia Niinkoti, Ludwig Kamboroto, Lasse Eriksson, Aletta Ngaikukwete, Timoteus Ndakunda naJosef Shivute. Aapeha yawo oyo Tuovi Pennanen, Kristof Shuuya naAsser Lihongo.

382

Okangundu komauthompango ka hogololwa mu kale: Omumbisofi Dr. Leonard Auala, Timoteus Shipanga (omuhayi), Jason Amakutuwa, Frans liuhwa, Natanael Sirongo, Olle Eriksson naHosea Nampala.

383

Ewilikongundu lyetumo lya uthwa li kale: Loide Mweendeleli, Reijo Kaarto, Frans Amunyela, Natanael Sirongo, Josia Mufeti, Markus Amushila naAnnikki Turinen. Aapeha: Sakaria Nghikefelwa naMagano Amukeshe. Aatonateli naawilikingeleka otaa kala mo omolwoshilonga shawo.

384

Epangelongeleka sho lya konakona aalongwasita mboka ya mana eilongo lyawo kOjtjimbingwe nolya dhimbulula oya gwana okuyapulilwa oshilonga shuusitagongalo, olye ya langeke ngeyi: Ludwig Kamboroto poNkarapamwe moRundu, Nikodemus Nuuyoma Ntinda, mOlukonda, Timoteus Hameva, mOmundaungilo. Eyapulilo moshilonga otali ka ningilwa momagongalo moka ya langekwa. Kombinga yomulongwasita Johannes Haileka, Epangelongeleka otali tegelele manganokutala ngele ta mono uukolele, oshoka okwa nika uunkundi.

385

Omolwoonkundathana dhopateologi tadhika kala kuMonrovia muKotoba/Novomba nuumvo (1978), Epangelongeleka olyu utha omusita Elia Niinkoti a kale omutumwa gwa ELOC nomupeha gwe a kale omusita Elia Nghikembwa.

**OSHIPALANYOLO  
SHONUUMVO**

Dha za kep. 1

Oshipalanyolo shomumvo nguka osho okupungulula omeho gooitaali nogaantu ayehe yaKalunga ya tale noya dhimbulule noyi itaale kehe gumwe polwe, monkalo ye kutya: Ekwatho lye otali zi kOmuwa.

Etumbulo ndjoka omupisalomi David, okwe li popi sho a li moshilando shaandjawa mulisraeli. Evi ndyoka lya udha oondundu nomasilu. Sho a li te ende mondjila, okwa mono komeho kaku na we oondjila. Sho ta tala komeho ge okulwete oondundu oonde, itaa vulu oku dhi londa. Ita vulu okupita mokati kadho, emanya lya kola. Okwa kanitha omukumo onakuyiwa ye oya thita nondhigu.

“Ongame otandi ligamene omeho gandje koondundu: ekwatho lyandje otali zi peni? Osho David a pula (Eps.121:1). Ombepe Ondjapuki muudhigu we oye mu pe eyamukulo. Okwa dhimbulula, nonando oondundu opo dhi li, uudhigu opo u li, okwa dhimbulula: “Ekwatho lyandje otali zi kOmuwa”.

Netumbulo tuu ndika olyo tandi longitha ngetumwalaka lyandje nolyOngeleka yetu, lyomumvo 1978. Otandi li tumine omagongalo agehe niilyo ayihe ya ELOK, popepi nokokule, naaleshi ayehe yOmu kwetu, opo li kale eyamukulo kepulo lyomuntu kehe nokonkalo kehe kutya: “Ekwatho lyandje”, “lyoye” “lyetu nolyawo, otali zi kOmuwa”.

Mpaka ondu uvite momumvo nguka pamwe noshipalanyolo shika otatu dhiladhila wo oshilonga shopersona ontintatu yomuukalunga “OMBEPO ONDJAPUKI”. Omahalelo momaudhigu getu agehe ogo: “Udheni Ombepo ondjapuki” Efes.5:18. Ombepo otayi ku ulika ekwatho mpoka tali zi: momahepeko, muunyengwi auhe, miilongayakulo yaKalunga, “Omupopili otandi mu tumu kune” Joh.14:7. Otu na omupopili. Oye ote tu longo ayihe, Joh. 14:27. Nena shaa owala tatu ende mekwatathano nOmbepo Ondjapuki notatu vulika kuyo: (Gal.5:16) “Kalenii nokweenda mOmbepo”.

Nonando onakuyiwa 1978 oya ninga oondundu koombinga adhihe, twa nyengwa okutseya: otatu piti peni, otatu hupile peni, otatu kwathwa kulye, etumwalaka olyo ndika kutya ndi itaale nokugalikana, nokutonatitha omeho gokomwenyo noku dhimbulula mewiliko lyOmbepo Ondjapuki kehe gumwe a mone ye a tye: “Ekwatho lyandje otali zi kOmuwa”. Omuwa nguka iha kotha ota gamene kuuwinayi kehe. Ota gamene omwenyo gwoye nuumvo naaluhe.

K. Dumeni

OMUKWETU JANUALI 15, 1978 3



## Omukulunhu owa kaana okaana kamukulunhu

Otu na eyeletumbulo limwe tali ti: "Omukulunhu owa kaana, okaana kamukulunhu." Sha hala okutya aveshe ova pumbwafana. Ndele luhapu ovakulunhu o-twa fa inatu hala okuuda ko nawa eyele eli. Ohatu li ningi luhapu "Omukulunhu owa kaana.

Otwa fa hatu kanifeni eenghundafana novanyasha vetu. Ohatu va nyemateke keembinga dihapu. Oshinima shinene osho onghalamwenyo yomunhu i kale ya veluka, ounhu aushe. Luhapu ovanyasha vetu ova ya mevalekafano omolu:

1. a wana vati eumbo
2. ta kulupile ko, epipi laye la hombolwa nale
3. Oku shi nawa oilonga
4. owomepata liyamba

Omatomhelo aa, nande haeshe a tongwa, okwa twala vahapu mohombo noku he na ohole pokati kovavalekafani. Kave li shii, ovakongelwafana, shamha ashike ve na sha shomoitwa ya tumbulwa metetekelo.

Momambo amwe ovanyoli otava ti, vati, ohole ohai lilongwa, ndele hanoupu. Sho osho halambudi ngaa, okovanyasha vovene ku na epuko. Hano epuko letu ovakulunhu otu li shi tuu? Tala enyeme lavo. Ovanyasha ova valekafana nee:-

1. Ve holafane
2. Ve shaafane
3. Ve uditafane noku ikililafana

Ndele nima a ye tuu keumbo, vati a tye po nee novakulunhu vaye, ovakulunhu opombada. "Halakwa. Lye a ninge oshitenya shetu?" Opombada hamo omu. "Epata lavo nonyalo yalo. Ayee e!" Nge okwa udile po nokuli umwe womepata e li panda, oto udu shapo taku ti: "Shapo oNhumba winya eshii nokuulikwa.

Omolwashike twa hala okuhoololela ovanyasha? Osheshi vati winya oye a pandika kovakulunhu. Ndele winya a pandika kumwene woshinima itaku pupwa. Hano naku lambwe nee ou a pandika kovakulunhu ile okomunyasha mwene? "Ohole oinene i dule aishe." Natu ninge ngahelipi hano? Otwa fa hatu eta oilanduli ngaashi:

1. ounhu aushe tau kana
2. ookakwali nde ku hala tava hapupala
3. Ohatu nanene ovanyasha vetu kokule nafye nokokule naKalunga.
4. Okuhadulika nokuhelineekela ovakulunhu taku dalwa apa yo.

Ovakulunhu ovaholike, tu konakoneni po nawa opo. Opo pe na omalimbililo shili napu yandjwe omatomhelo a yela, meenghundafana novanyasha vetu. Fyeni ovanyasha inatu linatingeni ngaa nee komboko lilifa, Ef.6:1-4; Kol.3:20-21.

Natu likonakoneni keshe umwe polwaye mwene, opo shihe tu ningile ongunga, komikemo nokeembinga neembinga.

A. Simon

## Oshivilo shetumo mOukwanyama

Oshivilo osha li sha ongala pOmafo opo pa li ongeleka yotete mOukwanyama kombinga ei, ya tungwa po kutatekulu Simsoni Shituwa nekwafo laMajoor Frank.

Ewilikongudu loshiongatumo mOshitaingeleka ola tokola Omisioni yomudo 1977 i danwe petindi opo pa hovela Ongeleka yotete, eshi Evaangeli la kufwa kOndjiva nOmupanda. Opa li eemangi edi da monene nomesho avo eshi ongulu tai tungwa, noi-ti tai tutwa netemba lohamba Mandume, eli la kufwa kOndonga.

Ovakalimo momisioni omu ova li ve dule 2000, ounona novakulunhu, ovanangeshefa va dja keembinga neembinga ova yakula nawa oshivilo noikulya.

### EUDIFO:

Eudifo melongelokalunga twa popifwa kOmuwilikingeleka tate Kleopas Dumeni ta ti: Ovatumwa ava ve tu etela evaangeli, ova tula mo eemwenyo davo. Eehamba nomalunga ava va tambula ovahongi tete ngaashi Ueyulu yaHedimbi, okwa tula mo omwenyo waye. Simson Shituwa pamwe novatetekekeli aveshe ova tula mo eemwenyo davo. Nafye natu tuleni mo eemwenyo detu tu yandje nomwenyo aushe.

Makele keengudu domalwiimbo noitevo i lili noku lili, opa li yo omapopifo nomahepu a kwata monghama. Omukulupe tatekulu Petrus Kanyeumbo ou a li po pehovelo lOngeleka oyo ya li ya tungilwa keengudi, oshipopipiwa shaye osha pwilikinwa nelitulemo linene.

Moshipopipiwa sha meekulu Rebekka Kaukungwa mwa holoka omatumbulo omuudifi munene wotete tatekulu Noa Shangheta Kaukungwa, oo taa ti: "Ounyuni ekokotenge, nande u taafine itou pifa. Ounyuni efidi la nyengena, oha li li vahapu outalala. Ounyuni owaKambia Kamahola." Meudifo laye laxuuninwa tatekulu Noa Shangheta Kaukungwa okwa ti: "Nand' ngeyi itedululeni osheshi ounyuni ou ota mu fii po," meme Rebekka osho e tu hepaululula penya.

Omuudifi ou munene oye xe yanakufya omufitaongalo Sem Kaukungwa ou a kala mOhalushu. Tatekulu Abraham Nepembe mokuhepaulula ondjila yavo yokukonga Kalunga, eshi tava di mOputu, okwe shi ninga nondaka tai ngengema mokutala engafifi lovanhu ve fike opo va itavela omushiti.

Tatekulu V. Kaulinge natatekulu Paulus Nailenge ovo va kwatela omikweyo dovafita komesho mokuya melongelokalunga. Nomatumbulo avo kongudu okwa li e na oshilonga shinene okupwilikinwa. Unene tuu

Tala kep. 8



Oyendji yomaagundjuka penulilo lyomamvo gwa zi ko oya li ya nyanyudha aakuluntu yawo sho ya li ye ya kuthitha omishila moondunda. Mefano otamu monika tate Ananias Ita (omwiilongi kO-sikola yUusita kOtjimbingwe, pamwe nomufuko gwe Josefina Ndinomukwathi (kwa li nale) Iniko. Ayehe oyomegongalo IyaKahao.

Omukwetu ote ya halele ondjokana yi na elago. Oshoshili kutya oshigwana itashi kala sha kola ngele kashi na oondjokana dha kola.



# OMPUMBWE YOONDOHOTOLA YA YAMUKULWA

*Okunwa otaku ningi omuntu egoya - ndohotola yoonkolwe a ti*

Ompumbwe yoonдохотola oya li ya holo-ka mOnandjokwe momimvo mbali dha piti sho oondohotola yatatu, Aasoomi, ya shuna kegumbo: Omundohotola gwomayego, omundohotola guanamiti nogwaakulukadhi.

Omasiku ngaka oluhepo olwa kuthwa po sho oondohotola yatatu: yaali Aasoomi nomuvalelwamo, ya taambelwa ishewe mOnandjokwe. Shika osha ningi kutya omwaalu gwoondohotola aguhe kumwe gu kale gu thike puntano.

Omutoolinkundana gwetu okwa kundathana nomundohotola Reijo Ojutkangas, gumwe gwoondohotola ndhoka opo dhe ya mOnandjokwe. Omusamane Ojutkangas manga inaa thikama okuya huka, okwa li ha longo mokapangelo koonkolwe. Omutoolinkundana gwetu okwa kundathana naye kombinga yiikunwa mbyoka ya ninga omukundu moshigwana she-  
tu. Oonkundathana dhawo odha li ngeyi:

## \* Oshiponga oshini shi li miikolitha?

— Aantu otaa nu noonkondo nando okunwa okuwinayi. Konima yethimbo omuntu ota ningi onkolwe nando ye mwene ke shi lwete, oshoka ote shi tameke ngeinyanyudho. Ngele omuntu a kala nokunwa ethimbo ele ote ke ya ponkatu mpoka itaa vulu we okukala inaa makela iikolitha. Omuntu ota tameke okweehama ehuli opo omutima, ta tameke okukakama, ta kambuka nokuli, sigo ita vulu we okweenda.

## \* Omuntu ote ningi onkolwe konima yethimbo li thike peni?

— Okuza pomimvo ndatu sigo ntano, ngele oho nu shinene. Ngele oho nu kashona nena otashi pula ethimbo ele kashona. Uuvu mbuka otatu tameke nguudhano. Omuntu ita gwanitha we iilonga ye. Ta nu opo aniwa a vululukwe. Okuza mpoka okwaanombili otaku tameke megumbo. Ihe natu ndhindhilike kutya aantu ihaa ningi oonkolwe ya faathana.

## \* Ngele nde ya koshipangelo otamu vulu ngaa okukwatha ndje opo ndi ethe po okunwa?

— Ngoka a nyengwa okweetha po okunwa ne ye mbala koshipangelo. Oshini-  
ma sha simana osho ehala lyomuntu mwene. Ngele ota gwanitha shoka aapangi taa ti, nena mpoka opo apuke tapu zi ekwatho.

## \* Oshiwana ngaa ngele aanona nayo taa pewa iikunwa?

Oshiwani noonkondo (okwa yeluka kashona koshipundi ye ta wilike) oshoka iikolitha uzigo. Onda mwene okanona mOshipangelo shaNandjokwe ka li pokusa, molwaasho ka pewa iikolitha, lagonene oka pangwa mbala.

## \* Uuwanawa owa shike wu li mokunwa iikolitha?

Miikolitha kamu na nando uuwanawa washa. Onda li muEgipiti moka nda mono kutya Aamoslem ihaa nu nando. Muhamendi okwa li e ya indike yaa hanwe, oshoka okwa tila ya kale itaa gwanitha iilonga yawo. Oklima ndjika (yomuNamibia) ompyu noonkondo, onkene oyi na oshiponga shi li popepi unene ngele omuntu oha nu iikolitha.

## \* Aalumentu nenge aakiintu ngele otaanu, ngoka ta yonwa po mbala kiikolitha oguni po?

— Ikolitha oyi na oshiponga shi thike pamwe kwaayehe.

## \* Omukiintu ngele oku li metegelelo yeha nu oshi na oshiponga?

— Oshi na oshiponga noonkondo, oshoka ehuli lyayina, ndyoka hali longithwa kokanona manga ke li mela otamu yishewe iikolitha, nena otali vulwa noonkondo, sigo omuntu a yonuka po thilu.

## \* Oshike we ya kuAfrika nando onkalo kayi shi ompu?

— Ou shi shi tuu kutya olwindji pehala lyontumba ope na owala uudhigu ngele ku po, sho omuntu to kundana mooradio niifo. Ihe oshinenenima, ngame ondi hole Afrika. Ne, Aayafrika, aantu aawanawa.

## \* Oshike ishewe to gwedha po?

— Ikolitha ohayi ningi omuntu egoya. Mokunwa omuntu oto kanitha ethimbo olindji. Oyendji yomoonkolwe oyo haa tsaathana noombele nohaa longo wo iilonga yilwe yi sitha ohoni noyi nyanyalitha.

Oonkolwe komeho otadhi ka tekulwa owala oshoka itadhi vulu okulonga.

## EPUKULULO

MONDJALULAMASIKU 1978

Aaleshi aasimanekwa, otatu mu indile natango ombili omolwiinima tayi landula inaayi opala mOndjalulamasiku yetu. Otatu mu indile ano ngeyi mu ninge omapukululo pomahala ngoka gu ulikwa mpaka.

1. Osoondaha yeti 16 Juli oyo **esiku etitatu lyegalikano.**
2. **Esiku eti 31 Juli olya dhimbiwa po** mokunyanyangidha, onkene li gwedhela po.
3. Nyola po wo ootekisti adhihe dhe-siku ndyoka ngaashi tadhi landula:
4. **31. M. 5Mos.7:6-11 2Sam.5:1-12** Oshipalanyolo shOsoondaha yepangulo osho: **Epangulo lyahugunina**



Omundohotola Reijo Ojutkangas, pamwe naanegumbo lye (okuza kolumoho) meme Terttu Ojutkangas, Mika (6) naLeena (15). Moshifo tashi landula otatu ka popya wo sha kombinga yomundohotola omuvalelwamo Naftali Hamata, osho wo komusita Reijo Kaarto, omusamane gwomundohotola gwomayego (Rakel).



## OKUYA KOMAMBO OTAKU KWAFWA SHIKE?

Tete opo u ude ko ondilo yokuya kongeleka, ou na okuuda ko oinima tai landula :

(a) Ongeleka oshike?

(b) Ou na okukala wa mona Jesus.

Ongeleka onhele oyo ya longwa komunhu palombwelo laKalunga. Monhele omo omo nee ovakriste hatu hambelele Kalunga. Omo yo hatu tu eengolo nokuhepaulula omatimba etu a dimwe po. Kalunga ohe ya okwoongala pamwe novanhu mongeleka, paudaneke laYe, ngaashi a lombwela Moses eshi a longekidila Kalunga oaltali.

..... "Ame ohandi ke uya kwoove ndi ku nangeke noupuna," Ex.20:24b. Kalunga okwa udaneke kutya keshe opo tapu ongala vavali ile vatatu medina laye, ota kala mokati kavu.

Mongeleka ovakriste otava shakene naKalunga nosho yo novakriste vakwao. Mokwoongala oku ovakriste otava twaafana omukumo. Ovakriste otava li koshililo shimwe moukumwe wakola, pamhepo. Pakumwe ou ovakriste otave linekelafana paushili nopafimaneko. Aishe ei otave i ningi ve li koshi yomavava aKalunga.

Okuya kongeleka otaku kwafa, shaashi kongeleka oko hatu ka shakena noishipili yetu, ovaudifi. Ovaudifi otave tu kwafa opo tu dule okumona omananga aa e li pomesho etu okeemwenyo. Pakwafu lavo hatu dulu okwiiwapaleka.

Ovaudifi ohatu va yeleke nomalima oo taa upike ovakriste opo va kale va twa nawa, ve na eememo. Ovaudifi ovo ova-shalaye yetu ovakriste. Yeleka nee ngeenge iho i kongeleka owa fa oshuta yoye hoi djala efiku keshe ndee ihoi twala kovashalaye, fiyo omudo ile omido tadi piti. Dimbulukwa okuya komambo otaku putuda ovakriste palutu, pamhepo nopamwenyo.

Okuya komambo ohatu mono omhito yokuya melongelokalunga. Ovakriste ohatu i kongeleka opo tu kadililwe. Hano hatu dililwa oikondjifo yolute oyo ihai lunduluka. Oikondjifo inai fa younyuni ou. Oiti ei twe i pewa, (Ef.6:10-17) opo tu lwe nomutondi. Mbela ngeenge iho dililwa, omukwaita tuu? Oto findana tuu mowoodi olo lwopakriste?

Okuya kongeleka otaku kwafa shaashi ohatu ka mona omayambeko. Omayambeko oo haa yandjwa komufita pexulilo lelongelokalunga ihaa wile pedu. Kongeleka ohatu ka yadifwa yo omhepo iyapuki. Kongeleka oko hatu ka mona elao la-shili.

"Ovanelao ovo otava kala meumbo loye, have ku hambelele alushelushe, Sela," Ps.84:5.

Ovakriste vakwetu, eshi kashi fi oudano, ndele aishe ei oyo oshili notai pula omutima wa wa pedu lela. Dimbulukwa, okuya komambo haku twala oikutu. Okuya komambo oku na sha nexupifo loye.

Jonas H. Mweutota

## OTWI IPYAKIDHILA UNENE NAASHOKA TASHI HULU PO

Shaangoka nuupyakadhi we. Etango itaali toko nande mbala ndi ye kokino! Ngame onda hala ku she ndi ka tse. Ngame onda hala ndi ka ninge omayalulo gostola yandje. Shitiwa ngame otandi ka landela aamwandje uuleke. Nakutse itale okamutenya, ndi dhi fale kohambo. Nda hala ketanga!

Ayehe osho ye na oshimpwiyu shika nenge shiyaka. Ihe kape na ootu ngo ta ti: "Itaa ku shi nenge iilonga itaayi zim-buka mbala ndi ka leshe Ombimbeli yandje nokugalikana."

Mbela otwa ndhindhilika tuu uufupi wethimbo lyetu kevi humo? Otwi ilongekidha tuu okusa nokutaamba olutu lwuuyelele tatu ka pewa kOmuwa gwetu ngele twi itaala, sho ta galuka? Olwindji otwa talele eso kuyakwetu. Otwa fa tu wete tse yene otu na ko ethimbo ele natango. Osho tuu?

"Ote si ngaa nda fa Nima nguno nekalananya olyo a li kee na!" Pamwe osho tatu ti ngaaka nenge shi vulithe po nokuli.

Aamwameme, itaku tiwa inatulongeni, ihe otwi ipyakidhila unene naashoka tashi hulu po! Pamwe tse omukwiyu tagu popiwa mu Luk.13:8, sho taku ti: "Tatekulu, gu etha natango omvula yimwe ..., ihe ngele itagu imi, nena nagu kewe po." Olye eshi wo, pamwe omumvo nguka ogwo twa li twa pewa tu ime iiyimati! Otwe etele ko wo tuu nando olyo egongwa?

Omuwambo oha ti: "Omukuluntu okwa lya efuma eyihu nuutsika." Oshi li mondjila. Kalunga ohi idhidhimike. Olukeno nohole yatate Kalunga aluhe okombanda yetu. Ihe otu na okudhimbulukwa, ethimbo lyesilohenda ohali piti. Omumvo gumwe aguke! Osho taku tiwa.

Ethimbo lyehupitho ongashingeyi. Konima yeso kaku na we eitedhululo nehempululo lyoondjo. Shi li ko okulya iiyimati yiilonga yoye. Mbela ope na ngaa ngono to panda nokunyanyukilwa uulanduli nuulongwa wasatana? Eeno, ope na! Ando hasho, ando ito etha ethimbo li pwe po inoo ilongekidhila EYO lyOmuwa nOmushiti gwoye, e ku hole.

Kristus okwe tu pa eyadhimo lye ndyoka e li pewa kuHe, opo tu ninge gumwe naye, Joh.17:22. Ngele pamwe oto nyengwa oku li mona, inda utale megalikano nando ongulohi ndjino yonena. Ngele owe shi ningi wi itula mo, Jesus oto mu mono, ndee to mu fala nokumushiinda. Yelekela!

Kuume kandje, ethimbo olya hugunina. Yuuyuni inayi kala komeho ihe KALUNGA OYE TANGO! Ngashi twi ile mo owala, osho tatu shuna. Ihe enyanyu oli thike peni, ngele tatu ka kala maandjaKalunga!

## POKANDO PWA DHIKWA EGONGALO EPE

MEtitano eti 6 lyaJanuali 1978 kOkando okwa li oshituthi oshinene, aantu 940 sho ya mono egongalo lyawo yene, ndyoka olyo eti 20 moshitayingeleka shUuninginino.

Omuwilikingeleka tate Kleopas Dumeni nekwotho lyaasita 11 okwa kwatele komeho osheendo shopashituthi shu uka tango komayendo keyapulo lyago. Shika osha landulwa kedhiko lyegongalo. Omatokolo gedhiko oga leshwa. Egongalo lyaGongo—yina—olya gandja kegongalo epe—omwana— aakuluntugongalo yaali, mboka taa taamba omambo agehe omakwagongalo moshikaha shomutonatelli-shitayingeleka Mika lilonga. Konima yaambika omuwilikingeleka okwa langeke Ismael Amupolo, a ninge omusitagongalo gwotango gwegongalo ndi epe. Melongelokalunga lyopashituthi omwa uvitha omusitagongalo.

Konima yokafudho okwa landula oshituthi, moka mwa hokololwa ondjokonona yoshiningwanima shika, egongalo olye etelwa omakundo ogendji molupe lwoondjimbo nolwomapopitho. Itashi vulika mpaka okutseyitha omadhiladhilo ogendji omawanawa momapopitho gi ili nogi ili, shila edhiladhilo limwe alike, li dhiladhilwe nawa komuntu kehe e li megongalo. Olyo ndika: Egongalo kali shi egongalo, aanona ngele ihaa holoka moosikolasoondaha, aagundjuka ihaye ya miigongi yawo, aakuluntu ihaa holoka nawa komambo, moongundumbimbeli nenge molwii-mbo, naantu ihaa futu iigandjwa yawo. Nena egongalo itali vulu okulonga.

Okwa li wo kwa longekidhilwa aanashituthi yokokule noyopopepi iikulya yopashituthi okukutitha ela, manga inaatu halakana pokuningina kwetango.—Oshihauto shomambo osha landitha omambo.

Esilohenda lyOmuwa Jesus Kristus nohole yaKalunga nehanganano lyOmbepo Ondjapuki nali kale wo pamwe negongalo lyaKando!

Toivo Tirronen

### ETSEYITHO KAALESHI YOMUKWETU

Omuleshi kehe oku na uthemba okunyola sha shoka a hala shi ye mOmukwetu: tashi kumagidha nenge okupopya kusha sha holoka moshifo, oshivanawa nenge oshiwiniyi. Shika otashi vulika mokunyola edhina lyoye ngaashi li li nenge lyoponto, (ngaashi naanaa hashi ningwa muuyuni), shaa owala edhina lyolela li shiwiki kaashangi yoshifo. Ontumwafu yaana mwene nando yi kale ya tya ngiini itatu ke yi nyanyangidha. Shika oshe tu pa ompito twaa ngungutule nomakana, ihe tu shi ninge noopena, shaa owala tu na omakankameno.

Amushanga

Esiku notundi ndjoka kaku na ngoka e yi shi, nando aayengeli yomegulu nenge Omwana oTate oye awike," Mat.24:36. Tu hedheni ano kuKalunga," Hebr.10:19. Shekutaamba V.V. Nambala



## OSHIGONGI SHA SWAPO SHA HULILE MOMADHENGU

Oshigongi sha SWAPO shoka sha li sha ningilwa pOluno, mOndangwa nosha piti-kwa kepangelo, osha hulile ondjilakati, sho sha halakanithwa po kaapopili yoTurnhalle, eti 16 lyaDesemba 1977.

Oshigongi osha li sha tameke pombali yokomatango nosha li shi na okuhula pohamano komatango. Mokutameka, uumati wu thike lwopomulongo owa kala nokufundila aakwashigongi omavi; noku ya dhenga nomapokolo, yamwe oya ningwa nokuli oontunda noombole.

Epiyaganeko lyotango inali imba oshigongi shi tsikile. Sho iilyo ya SWAPO ya li ya hala okuyamukula omahindo ngano, omusamane Aksel Johannes (ngoka a li omuwiliki) pamwe nomusamane Tauno Hatuikulipi oya kumagidha aakwashigongi yaa itule miilonga yaapolosi, yokudhiginina oveta nelandulathano. Aakwashigongi oya vulika noshigongi sha tsikile nombili.

Manga aakwashigongi ya pulakena koshipopiwa shomukwaniilwa gwAanama, omusamane Witbooi, ohaluka ngepathimo lyeho, oya ponokelwa kaakwiita yOwambo, taa ziilile kombinga hoka kwa li kwa thikama aakwiita naapolosi ya S. Africa.

Mevundakano ndyoka omakende giihauto oga teywa mo, omatayela giihauto ga yahwa noondjembo tadhi umbwa shaa mpoka, mumwe nomukugwomahodhi (traangas). Osha li oshikumithi okutala aakiintu ye li metegelelo taa matuka, yamwe ye li olutu lwowala, sho oonguwo dhawo ye dhi kuthwa. Yamwe oyi ihata po owala ya kanitha omukumo, kutya itaa hupu we. Omukwashigongi gumwe okwe shi holola nokuli kutya opwa li shili Kalunga ta pungulula ooholo dhoondjembo, opo dhaa monithe aantu oshiponga.

Mokuhalakana ngaaka muumbanda aakwashigongi yamwe (unene mboka ya za mUushimba) oya yi pomahala mpoka inaaya tseya po nale. Oyendji oya kanitha omaliko gawo: oondjato dhopeke (moka mwa li iimaliwa noombapila dhopaumwene), oongaku, uundunda niikwa wo kaayi shi okuyalulwa.

Oonakulandula iiningwanima yoshilongo shika oya ti kutya oohapu ndhoka dha popilwe kOministeli yOwambo omusimanekwa Kornelius Ndjoba omasiku ga piti odha tsu nduno, kutya okwa pele owala SWAPO okampito, opo a ninge oshigongi, shoka e shi yekelekele nomutse gwohima gwa anduka ko, omuntu wu vule oku gu teta ko.

Oshiningwanima shika osha kolekele wo oyendji mokwaaitaala omupanguli Steyn. Omupanguli Steyn okwa tile kutya okwa kutha po ooveta dhimwe, moka a gandja epitikilo kongundu kehe yopolotika moshilongo yi ninge oshigongi, opo yi ilongekidhile ehogololo lyaayehe lya manguluka, ndyoka li na okuningwa aniwa muNamibia.



**Omusamane Eino Hauuanga, oshilyo sha SWAPO, ngoka a li e ehamekwa moshipala kaapopili yoTurnhalle.**

Konima yoshigongi Radio Owambo okwa tseyitha kutya itaku ka pitikwa ngoka ta popi nayi aapangeli yOwambo. Aawambo ngele otaa ti kutya inaa hala SWAPO, nena oministeli ote ya kwatha, osho oradio ya ti.

Manga ayihe mbika tayi ningwa oministeli yUuyuki mOwambo, omusamane Tarah Imbili okwa thikama owala a mwena. Sho a pulwa okwa ti: Kandi shi wo kutya omadhengo oga ziilile peni nangame onde mu fa owala. Mangestrata gwaNdingwa (a homata okambistoli ponto) omugandji gwopolemeta, opo oshigongi sha SWAPO shi ningwe naye ina hala okuyamukula kutya omolwashike aantu taa dhengwa. Oku uvaneke owala okugandja opelemeta yokunwetha omahooli, opo ayehe mboka ya za mUushimba ya vule okushuna mbala, manga inaaya monithwa oshiponga.

Aanenentu yometanga lyaapolosi nayo opo ya li, ya homata, ye li miihauto yoombuluyamunkete. Nayo kapwa li gumwe a li ta vulu okugandja eyamukulo omolwashike aantu taa dhengwa.

Omutoolinkundana gwa SAUK sho a pulwa a yeluthe okakola opo a kwate onkundathana dhamangestrata nomukwashigongi gumwe, te mu pula kutya omadhengo oga ziilile peni, okwe shi tindi okayaguyagu.



**Tate Paulus Nashongo naye okwa li e ehamekwa kolumoho lwoshipala. Omukwetu mokunyanyangidha omafano ngaka ina dhiladhila andola sha shilwe shaashi okukoleka shoka a shanga. Efanonyoshigongi tala kependja lya landula.**

### Elelo lyOwambo eyapuki - Heita a ti

"Oshiningwanima shoka sha li sha ningwa poshigongi sha SWAPO mOwambo, otashi sitha oluhodhi ihe oshi na okukala sha tegelelwa, uuna aaleli yopashigwana taya popiwa nayi piigongi yoludhi nduka," osho oministeli yElongo mOwambo omusamane Titus Heita a ti.

Oministel Heita oya li ya gandja ehokololo kiifo tali popi kombinga yehalakanithopo lyoshigongi sha SWAPO, shoka sha ningilwe pOndangwa 16 Desemba 1977.

Omusimanekwa Heita okwa holola kutya ye ke na naanaa owino wa gwana waashoka sha ningwa po, ihe shoka e shi ooshoka kutya aapopi poshigongi sha SWAPO oya li taya popi nayi aaleli yOwambo. "Elelo mOwambo olya talika kAawambo eyapuki," osho oministeli ya ti.

"Ondu uvitile oluhodhi shoka sha ningwa, ihe aantu naa ethe po okupopya nayi elelo lyopashigwana. Oonkambadhala kehe tadhi ningwa oku li popya nayi otashi etele oshigwana oshiponga (backlash)."

"Kehe mpoka elelo lyopashigwana tali popiwa nayi nena uuyuni otau tegelele uudhigu tau zilile kaantu. Elelo ndika olya simana mOwambo, oshoka aaleli mbaka oyo ayeke aaleli yolela mboka taya pangele aakwashigwana."

"The itandi dhimine po (condone) ehalakanithopo lyiigongi," osho oministeli Heita ya ti.

(Advertiser)



*Mupponer*

## OMINA YATJIHASE YA PATA

Omina yaTjihase ndyoka yi li popepi nOvenduka, hayi fulwa ongopolo, okwa tseyithwa omasiku ngaka kutya otayi hulitha po okulongwa. Epato ndika olye eta kutya aalongi 1 200 yomomina ndjika oya gumwa koshiningwanima shika. Omwaalu nguka omunene ogwa thikama mAaludhe 1 026, Aatiligane 110 nOokleurlinge 68.

Edhiladhilo lyokupata omina ndjika olya tseyithwa tango kEhangano lyOomina lyomuJohannesburg (Johnnies). Pahokololo ndyoka lya gandjwa kehangano ndika, epato olya zi mpoka, aniwa, sho ondando yongopolo tayi shuna pevi osho wo eliko lyehangano tali shonopala.

Momumvo gwa zi ko ehanganano ndika, (Johnnies) olya tseyitha kutya otashi vulika iilonga yomina ndjika yi pate. Omwaalu gwooranda oomilyona omulongo ogwa kanene wo momina ndjika.

Ehangano lyoomina lyaJohnnies olya li lya gandja oomilyona R28 opo li mone iihohela. Oomilyona R19 odhoofuto dhaamboka taa longo momina. Omwaalu gwahugunina ogwa topolelwa koombanga dhi ili nodhi ili.

Oomina ndatu dhongopolo: yomOshomeya, Oamites noKlein Aub sho dha pulwa kombinga yomadhiladhilo gadho molwokupata komina ndjika, odha ti kutya odha gumwa kepatto ndika, unene omina yaShomeya, molwaasho opo ya li ya longo ohite yoomilyona dhooranda omulongo, opo yi vule okuhengumukitha ongopolo yaTjihase.

Omina ndjika oya tameka okulongwa momumvo 1976.

(Advertiser)

## Despair Grips me

I have no other helper than you.  
no other father,  
no other redeemer,  
no other support.  
I pray to you.  
Only you can help me.  
My present misery  
is too great.  
Despair grips me,  
and I am at my wit's end.  
I am sunk in the depths,  
and I cannot pull myself up  
or out.  
If it is your will, help me out of this  
misery.  
Let me know that you are stronger than  
all misery and all enemies.  
O Lord, if I come through this, please  
let the experience, contribute to me  
and my brothers' blessing. You will not  
forsake me; this I know.  
Amen.  
Rev. Oscar Ndatya ya Shame



Ombinga yoshigongi sha SWAPO shoka sha li sha gongala pOluno, mOndangwa.

## Oshivilo shEtumo mOukwanyama

Dha za kep. 4

omatumbulo amwe a tatekulu Kaulinge, omo a ti onhaanguda ihai keelelwa kwina, shapu oto i dipaa, ove ino i keelela ko ne owe i dipaa. Okwa yelesa onhaanguda novanhu eshi va li tava di mOputu tava kongo evaangeli. Va li tava keelelwa kooxe nooina novakwapata shafa tava i eenghwenyu. Okwa ifana omadina amwe ta ti: Emilia yaNhinda omo e li omu? Aili yaMwatotele! Beata Ishindi? Vana vange, vana vange, edi eenhaanguda daKalunga. Konima yomatumbulo aa nokutala nee eenhaanguda odo eshi di li ofika komesho yovanhu. Kape na ou ite li feta omahodi kehafo nomutima wa enda shili.

Tatekulu Ismael Nhinda okwa ti: Opa kala oinima oyo tai kwata oshilonga shetumo moshipala, ndele paafa Kalunga okwe i kandula po, onghee Evaangeli ota li tandavele. Vahapu va li po ova li shili va pwilikina fiyo opexulilo.

Ongalo yOshivilo oya ongelwa kOvakongindjila nova longifa oiti ile ya mangelwa oulapi koxulo nomoulapi ile moukutu omo, omo ne ovanhu va tula sha shetumo. Ongalo inya oya dja R169-55.

Ovakwetu amushe ohandi mu pandula eshi mwe uyile kOshivilo shetumo nomwa ninga shihapu. Omaongalo okwa wanifa oshinakuwaniwa shao eshi va eta (oinakuwani-fya yavo) oietelelwa omolwetumo.

Mefaneko omwa li kutya eongalo keshe nali etelele (ongele) R40-00 omolwetumo mOshitai.

Omaongalo okwa eta nee ngaha:

- |                        |         |
|------------------------|---------|
| 1. Engela .....        | R100-00 |
| 2. Onheleiwa .....     | 75-40   |
| 3. Ondobe .....        | 70-00   |
| 4. Endola .....        | 60-00   |
| 5. Okalongo .....      | 57-50   |
| 6. Ongenga .....       | 50-00   |
| 7. Olupandu .....      | 40-00   |
| 8. Ohalushu .....      | 40-40   |
| 9. Edundja .....       | 30-00   |
| 10. Eembaxu .....      | 20-00   |
| 11. Kongo .....        | 20-00   |
| 12. Okatope .....      | 15-00   |
| 13. Eenhana .....      | 2-00    |
| 14. Ongwediva .....    | 00-00   |
| 15. Omundaungilo ..... | 00-00   |

Ongalo yOshivilo 169-55  
Kumwe R750-15  
Kalunga na yambeke omaongalo.

F. Shikomba  
Omupashukili

## OMUKWETU

Oye oshifo shOngeleka Onkwaevangeli pa-Luther yomOwambokavango.  
Oha nyanyangidhwa mOshinyanyangidho shOngeleka mOniipa.  
Omukuluntu gwoshifo omumbisofi dr. Leonard Auala.  
Amushanga Ambrosius W. Amutenja.  
Ondando yOmukwetu komumvo muAfrika R 2-00, kombanda yomafuta R 4-00.  
Omambesitelo pamwe noondando naga tumwe kOmukwetu Oniipa, P/B. 2013 Ondangwa 9270

OWAMBOKAVANGO CHURCH PRESS  
ONIIPA P/BAG 2013 ONDANGWA 9270